

მეგობრებს

მეგობრებო, წინ... წინ გასწით,
ნუ შედრკება თქვენი გული, .
დე, მკერდს სისხლის დალი აჩნდეს
და შუბლს ოფლის ნაკადულას!

წინ, წინ, მედგრათ შევებრძოლოთ
ჩარხუკულმართ ამ ჩვენ დროსა,
ჭირის ოფლში გავატაროთ
სიმართლის და ძმობის დროშა!

დეე, ჩვენ ტოლთ, უგვანო შვილთ,
კერპის წინა ხარონ ქედი,
ფუ, იმ ვაჟკაცს, ვინც ინატროს
მათი სვე და მათი ბედი!

დე, ისევ მათ ავარჯიშონ
საქვემძრომით მკლავი, ენა,
სხვა აკვნესონ და ამ კვნესით
თვით იპოვონ შვება-ლხენა..

მომავალი იმათ თვის ხვედრს
წარმოუძღვნის, დასდებს მსჯავრსა,
შეაჩვენებს იმათ საფლავს
სამარცხვინოს, საზიზღარსა!

მეგობრებო, ჩვენ ნუ გვინდა
ამნაირი სვე და ბედი,
ბრძოლა იყოს ჩვენი ლხინი,
სატრფიალოთ - გულს იმედი!

მაშ, უშიშრათ შევებრძოლოთ
ჩარხუკულმართ ამ ჩვენ დროსა .

და ჩვენ რაზმს წინ წაეუძმღვაროთ
სიმართლის და ძმობის დროშა!

1895 წ.